

Članak Paddy Ashdowna, visokog predstavnika za BiH: "Glasajte za bolje sutra"

Izbori koji nas očekuju za nešto više od sedam dana predstavljaju važan dio života u demokratskom društvu. Međutim, neke ankete pokazuju da bi se moglo desiti da na ovim izborima imamo slab odziv birača. To je razumljivo zbog toga što je većina građana apsolutno prezasićena politikom i političarima. Međutim, takvo razmišljanje ne može promijeniti postojeću situaciju. Građani ove zemlje žele reformu, i žele ono što će im ta reforma donijeti: budućnost u Evropi, investicije, bezbjednost, putovanje bez ograničenja.

Dobra vijest je da i Evropa želi da Balkan postane njen sastavni dio. Dakle, taj evropski san može postati stvarnost ukoliko političari počnu bolje raditi u interesu svojih građana i ukoliko građani počnu da svoje političke predstavnike pozivaju na odgovornost.

Izbori se zasnivaju na principu odgovornosti. Lokalni izbori su u velikoj mjeri okrenuti egzistencijalnim pitanjima jer na tim izborima građani nastoje da izaberu osobe koje mogu obezbjediti konkretne rezultate.

Na izborima građani imaju glavnu ulogu, a ne političari. Izbori su oružje koje građani imaju na raspolaganju kako bi smijenili one koji nisu ispunili njihova očekivanja i zamijenili ih ljudima za koje vjeruju da mogu pokazati konkretne rezultate. Lokalni izbori se odnose na izgradnju više puteva, redovniji odvoz smeća, postavljanje novih krovova na školske zgrade itd.

Političari jednostavno moraju osigurati rezultate odnosno ispuniti svoja obećanja.

Opštine imaju jednu karakteristiku koja ih čini specifičnim u odnosu na druge nivoe vlasti: one su u direktnom kontaktu sa građanima kojima pružaju usluge i iz tog razloga moraju daleko efikasnije funkcionisati nego viši nivoi vlasti. Možda se neki političari neće složiti sa ovom konstatacijom, ali smatram da većina građana dijeli moje mišljenje.

Značaj opštinske politike nije ograničen samo na opštinu. Opštine mogu imati značajnu pokretačku ulogu za bolju budućnost ove zemlje. Mislim na budućnost Bosne i Hercegovine u Evropi. Međutim, ovdje se ne radi samo o potpisivanju sporazuma i ratifikaciji protokola. Ova budućnost se odnosi na poboljšanje kvaliteta života, da i građani ove zemlje na raspolaganju imaju zaštitne mehanizme, usluge i privilegije koje su uobičajene u drugim zemljama evropskog kontinenta. Opštine su te koje će građanima pružati veliki broj ovih usluga i mehanizama.

Opštine su sastavni dio sveukupnog programa reforme. Na nivou Bosne i Hercegovine završavamo uspostavu institucionalne infrastrukture koja može garantovati budućnost, mir, demokratske slobode i prosperitet, bez obzira koja je politička stranka na vlasti. Mi naime postavljamo krov na "institucionalnu zgradu" BiH i završavamo proces njene izgradnje. Međutim, ove aktivnosti nemaju smisla ukoliko obični građani ove zemlje ne budu mogli uočiti razliku. A vrlo je vjerovatno da će ta razlika biti očigledna na opštinskom nivou.

U narednih šest mjeseci predstavnici međunarodne zajednice i naši partneri iz BiH će svoje napore usmjeriti na jačanje državnih struktura, kao što su Ministarstvo odbrane, bolje policijske snage, jasno definisan obavještajni sektor pod parlamentarnom kontrolom, sa kojima će BiH bolje funkcionisati.

Takođe ćemo poduzimati napore kako bi obezbijedili da početkom 2005. godine u BiH možemo početi s provođenjem suđenja za

ratne zločine. Naš cilj je da što prije širom otvorimo vrata ka NATO-u i EU. Međutim, to neće biti moguće ukoliko organi vlasti BiH, a posebno organi vlasti RS, ne pokažu da su, u najmanju ruku, spremni da u potpunosti sarađuju sa Haškim tribunalom.

Naši ekonomski prioriteti obuhvataju završetak priprema za uvođenje PDV-a i objedinjavanje carinskih uprava.

Možda sve ovo zvuči previše tehnički. Međutim, rezultati ovih napora imaju vrlo praktičan uticaj na svakog građana BiH i svakog se lično tiču. Veoma je jasno šta sve ove stvari znače – one će dovesti do vidnog poboljšanja kvaliteta života svih građana. To je upravo ono na što politika na svim nivoima treba usmjeriti svoje napore i to je ono na čemu bi se trebali zasnivati i ovi opštinski izbori koji se održavaju sljedeće sedmice. Ovdje se ne radi o političkim strankama nego o politici koju one provode, o izboru onih ljudi koji mogu poboljšati situaciju. Moramo iskoristiti ovu šansu koju nam pružaju opštinski izbori.